

Lentswe la Modimo le Tlile ho Moporofeta William Marrion Branham

"Meya Ya Thetso E Hhalosang Lentswe La Modimo"

O se ke wa ahlola moetsadibe. Eba le mohau ho yéna. Mo tlohellle a tswelle le ho tsuba kakane ya hae, mo tlohele a nwe tahi ya hae, mo tlohele a tshware moketjana wa hae wa dikarete. Boo ke boithabiso ba hae. O se ke wa mo nyatsa. Ha a etla lapeng le tsohle, ka ho kgathala le ho tepella, o batla boithabiso bo itseng. Ntho eo o ka e etsang ke hore o phele bophelo ba borapedi ka mokgwa wona hoo o ka mo kgodisang hore Evangedi e ruile ho hong makgetlo a dikete tse leshome ho feta monate oo. Le hore ha a ka shwa maemong ao, o tla ya Diheleng, ka tahi ya hae. Hoo ke tjhefo ya Diabolosi. Ekare ha a eshwa a ntse a hopa kakaneng eo ya kgale, Modimo ke Moahlodi wa hae. Ha a ka shwa a ntse a hlwahlwaela mona, a tantsha, a matha hohle ka meaparo e mebe, Modimo ke Moahlodi wa bona.

Empa ho na le ntho e le nngwe, ha o eshwa tlasa Matla a tlotso ya Moya o Halalelang, jwaloka ha Setefane a entse nakong eo a neng a lelala hodimo sefahlehong sa Modimo, a re, "Ke bona Lehodimo le phetlilwe, le Jesu a eme letsohong le letona," o habile Lehodimong, jwaloka lefokotsane sehlaheng sa Iona. Amen.

Meya ya thetso e hhalosang Lentswe la Modimo! Tlamolla, tlohellla. "O etsa hoo jwang, Moena Branham?" Tlohellla feela. Ke phetho seo o loketseng ho se etsa. Nka Lentswe la Modimo. O se ke wa leka ho sebetsa ntho e itseng. O se ke wa kgumama fatshe aletareng, o e otla, o hweletsa, "Morena, mphe Moya o Halalelang! Morena, mphe Moya o Halalelang!" A ke se tle ho wena, o ntse o otla aletareng eo. Hoo ha ho lokise letho. Tjhe. Ha se mokgwa oo A tlang ka wona. Ke, ho Mo nka Lentsweng la Hae!

Sheba Petrose. Petrose o ne a le maqakabetsing, ha bonahala eka o ya ho shwa. Yaba o bona Morena a etla, a tsamaya hodima metsi. Mme a re, "Morena, ekare ha e le Wena, ntaele ke tle."

Morena a re, "Tloo."

Jwale Petrose a re, "Morena, bea pelo hanyenyane, a nke ke ye ho itima dijo matsatsi a mashome a mane, ho bona hoja nka tsamaya hodima metsi ao, kapa tjhe. Oho Morena, a nke ke tsholohelwe ke Moya o lekaneng hodima ka, hore ke kgone ho hobela Moyeng le ho bua ka dipuo, sekepeng sena, ebe hona nka nkang kgato ho tswa"? Tjhe, monghadi! O ile a nka Modimo Lentsweng la Hae, tlamolla mme o tlohelle. Modimo o ile wa mo tshedisa.

Hoja Modimo a ne a ile a kopana le Moshe, mme A re, "Moshe, theohela tlase moo Egepeta, mme o bolelle Faro, 'Lesa batho ba Ka ho ikela'"? Hoja Moshe a ne a itse, "A nke ke ye ho itima dijo matsatsi a mashome a mane, pele, mme ke bone hoja ke ena le tumelo e lekaneng ho O utlwa, Modimo. Mphe se seng, ntho e nngwe hape Morena. E re ke O bolelle se seng, a nke ke bone hore na nke se kene Moyeng, pele"? Moshe ha a ka a botsa dipotso tsa letho, o ile a nka feela Modimo Lentsweng la Hae, mme a tloha. Ke wona mokgwa oo o loketseng ho etsa hona ka wona, nka Modimo Lentsweng la Wona. Ebe jwale o tla tseba hore o tla kgona ho etsa hona. Ha a ka a leta ho fihlela ntho e nngwe e etsahetse, o ile a tswela pele feela a etsa hona.

O reng ka Elia, ha a ne a theoha ho tswa Thabeng ya Karme, a hlotse moo hodimo nako e telele. Mme a kopana le mosadi wa batho wa mohlolahadi, e ne e le... e le wa hosele, Moditjhaba. Mme yare ha a kopana le yena tlase moo, o ne a ntse a thonaka dithutswana tse mmalwa, ka jareteng. Mme Modimo wa mmolella, "Theohela tlase tlung ya mohlolahadi eo." Kgidi sebaka se jwang hore moreri a ka ya ho sona!

Ke enwa a theosetsa tlase moo tlung eo ya mohlolahadi. Mme ha a entse, o ne a ena le thutswana tse pedi. A re, "O ntse o etsang?"

A re, "Ke thonaka dithutswana. Ke na le phoshwana e lekaneng feela ho etsa dinkgwana tse mmalwa tsa bohobe. Ke phetho se setseng seo ke nang le sona. Ho se ho le dilemo tse tharo re sa fumane pula." Mme a re, "Homme ke tla lokisa dinkgwa tsena tsa koro. Mme nna le mora wa ka re tla di ja, re ntano shwa."

A re, "Etsetsa nna, pele!" Halelluya! Oh, ke—ke a tseba hore ke batla ke hlanya hanyenyane, empa ke ka lehlakoreng la Morena, leha ho le jwalo. A re, "Etsetsa nna, pele! Hobane, HO RIALO MORENA!" Ke moo hee.

Ke eng? "Batlang Mmuso wa Modimo, le ho loka ha Hae pele!" Eseng Mmuso wa Modimo le "leratanyana," e seng Mmuso wa Modimo le "maikutlonyana," e seng Mmuso wa Modimo le "ho honyenyane ha sena kapa sane." Empa, "Modimo, tokeng ya Hae, mme dintho tsena tse ding tsohle le tla di ekeletswa!" Beang pele!

Jwale, etlaba re utlwile seo. Tumelo e tla ka kutlo, kutlo ka Lentswe. A re, "Hoo ke Lentswe la Morena, hobane eo ke monna wa Modimo ya halalelang. Ke moporofeta wa Modimo, mme ke a tseba hore ke nnate. Mme hoo ke Lentswe la Modimo."

Jwale, ha a ka a tshela a matha ho botsa baahelani hore a etse ka mokgwa ofe. Ha a ka a batla ho ya le ho arolelana a hae... le ho bolella baahelani, a re, "Jwale, le nahangang? Moreri o tlung ya ka mme o bolela sena. Susi, o nahangang ka see."

O ile a kena ka hare, le ho qalella ho phophothela ntle. O ile a lokolla. O ile a lokolla seo a neng a ena le sona, hore a tle a fumane ho fetisang. Ke seo lefatshe le se hlokang kajeno, ke ho tlohellla ho lokileng ha mehleng ya kgale bakeng sa seo o nang le sona. Halelluya! O ile a hlohlorela ntle, hore a tle a kgone ho tlatswa. O ile a

tshollela oli yohle eo a neng a ena le yona, le oli yohle eo a neng a ena le yona le phofo yohle eo a neng a ena le yona, ho moreri, Mmusong wa Modimo. Mme yare ha a e tsholletse yohle kahare moo, Modimo o ile a theoha, a tlatsa tekanyo ya barele ya phofo, le ho tlatsa lefiso la oli. A e tshollela hape sejaneng sa moreri, mme A theoha, ho se tlatsa hape. A tshollela kahare. Nako le nako ha ne a tsholla, A tlatse.

Ke tla re kajeno, hoja motho a ne a ka phophothela ntle bosawana bona bohole ba ho itshwara ka-hore-le-ka-hore le ho etsisa Bokreste, le ho dumella hore Moya o Halalelang o nke sebaka sa Wona, ho tla ba le tsoseletso e tla qala mona Seterateng sa Eighth le Penn e tlang ho haola le na ha yohle. Telang bosawana, kgutlelang Lentsweng la Modimo. Hlohlorelang ntle, hore le tle le tlatswe. O tlohelle, mme Modimo o tla tlatsa kahare. Dinthwana tsohle, "O loketse ho etsa *hona* mme o loketse ho etsa *hwane*, o loketse ho etsa *hona*, o loketse ho etsa *hwane*." E lebale! E hlohlorelle ntle ho moywa hao!

E re, "Modimo, hohle ho tloha mona a nke ke... tsatsing lena, ke be wa Hao ka ho phethahala. Morena, ke tla ka pelo e robehileng. Ke tla ka moywa o hlomohileng. Ke a O rata, mme O a tseba hoba ke a O rata. Mme ke batla ho lebala hohle ha bohlanya bona bohole ba ho itima dijo matsatsi a mashome a mane mme ke bone haese hoba nka atamela Modimo, le hohle hona ha sena, sane, se seng, bosawana bona bohole."

Bo lese! Ha ho le letho Lentsweng le o bolellang ho ba le ho itima dijo ha matsatsi a mashome a mane. Ha ho le letho. Ha ho letho lefatsheng le o bolellang ho itima dijo, ntle le hore Modimo a o bolelle. Mme ha o itima dijo, o ke ke wa lapa, le ho ya le ntho tsena tsohle. Ha o ntse o itimile dijo, moena, o tla ba le thabo le nyakallo ka dinako tsohle. Ho thwe, "Le se ke la itlhahisa pela batho jwalokaha baikaketsi ba etsa, ka sefahleho se

sosobaneng, se hlokofetseng. 'Ke ntse ke itimile dijo matsatsi a mashome a mane, dijana tsa ka ha di sa ntekana ho hang. Ke dihile diponto tse mashome a mararo, mme ba mpoleletse hore ke shebeha hantle kamorao ho hoba sena se fete.'" Oho, dithole! Ke meya ya thetso ya Diabolosi.

Ema aletareng, mme o re, "ho bokwe, ho bokwe, ho bokwe" ho fihlela o batla o sa kgone le ho bua letho feela, mme ho thwe, "O tlamehile ho bua ka dipuo pele o fumana Moya o Halalelang." Dithole! E phophothele ntle!

Ntsha seo tsamaisong ya hao mme o tle Lentsweng la Modimo! O boletse, "Bakang, e mong le e mong wa lona, mme le kolobetswe ka Lebitso la Jesu Kreste tshwarelong ya dibe tsa lona, mme le tla nka neo ya Moya o Halalelang." Ekare ha Modimo o sa boloke Lentswe la Wona, ha se Modimo. Amen! Phophothela ntle! Tlatswa! Amen. Whew! Ke rata seo, ke Lentswe la Hae. Modimo o itsalo. Ke nnete. Mme ha Modimo o le buile, Modimo o tla le hlokomela. Ke hantle. Boitokisetso bohole boo o bo etsang, ho tsamaya kereke hohle hoo o ka ho etsang... .

Ho tshwana feela le mona tlase moo ho sebetwang makoloi moo ba teang sekgakgatha se seholo sa makoloi a diphahlo, kapa sekgakgatha sa makoloi a rwalang batho. Nkile ka sebetsa moo. Mme ba nka le ho haha makoutjhu a bona a maholo le dintho tsohle, le ho kenya patsi e thata, ya mahakoni e manehilweng hohle ho pota-pota, mme ntho e nngwe le e nngwe e be ntle jwang, ba e bee ntle moo seporong, mme e ne e shwele jwaloka thakgisa ya monyako. Enjene ke eo e eme moo, ha ho setimi kahara yona, e eme moo feela.

Seo e se hlokang kajeno ke mollonyana kahara boilara. Seo e se hlokang kajeno ke setiminyana se itseng. Seo e se hlokang kajeno, kereke, ho bedisa... Ntho e tjhesang ka ho fetisia e belang e teng ho ka bedisa sebe ho se ntsha bophelong ba hao, ke lerato. Mme ekare ha le sa

kgone ho ratana, le tla rata Modimo eo le eso ho kang le mmona jwang? Lerato le pata dibe tse ngata-ngata. Kena leratong le Modimo, mme le tla ratana, ke hona o tla rata kereke, o tla rata Tsela, o tla rata ntho e nngwe le e nngwe e halalelang, mme o tla kgelohela dintho tsa lefatshe.

Meya ya thetso e phailang e bolella batho sena, sane, kapa se seng, "Ba tlamehile ho etsa sena, ba tlamehile ho etsa sane." Ke ka lebaka la hobane mekgatlo ya dikereke e hlahile, mme ba na le tshenolo e nyenyane eo ba e bolelang, "Ho lokile, jwale, ke dumela hore motho... ke dumela nthong e jwaloka ho hweletsa, ka Bibeleng." Ke hantle, ke nnete. Ba bopile mokgatlo ka yona, "Ha o hweletsa, o na le Wona." Empa ha o na wona.

Ya latelang a hлаha, a re, "Ho bua ka dipuo." Ke hantle, ho ka Bibeleng. "Empa ha o bua ka dipuo o na le wona." Empa bongata ba bona bo buile ka dipuo mme ba ne ba se na wona. O a bona? Ha se Wona. Tjhe, monghadi.

Bongata ba bona bo boletse, "Ke hantle, re loketse ho porofeta."

Sheba baporofeta bana mona ka manaka dihlohong tsa bona, ba qhomela hodimo-le-tlase ba porofeta. Mme Mikea o itse, "Lona, e mong le e mong, le leshano." Amen. Ke hantle. Modimo ha a rate seo. Modimo o tla pelong e tshephahalang e tlang ka moyo o hlomohileng, o robehileng. "Ya jalang ka meokgo, o tla kgutla ka thabo, a ntse a thotha mangata a hae." Amen. Lokisa hoo, motswalle.

(Ho tswa ho Meya Ya Thetso, Phupu 24, 1955)

Temoso Ea Tokelo Ea Qopitso

Litokelo tsohle li babaletsoe. Buka ena e ka porintoa ka porintara ea lelapa molemong oa motho eo kapa ea abjoa, ntle ho tefiso, e le thepa e jalang Evangelia ea Jesu Kreste. Buka ena e ke ke ea rekisoa, ea boela ea hlahisoa ka bongata, ea manehoa leboteng la website, ea bolokoa ka tsela eo e ka boelang ea ntšoa, ea fetoleloa ka lipuo lisele, kapa ea sebelisoa ho qela matlole ntle le tumello e ngotsoeng ea Voice Of God Recordings®.

Ho fuoa boitsebiso bo bong kapa bakeng sa thepa e nngoe e ka fumanoang, ka kopo ikopanye le:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org